

DRETGIRA ADMINISTRATIVA

Claustra sa dosta adumbatten cunter tempo 30

Il recurs da la vischnanca refusa la Dretgira administrativa dal Grischun. L'onn passà aveva la regenza decretà tempo 30 a Claustra. Igl è stà ina da pliras mesiras per reducir la canera. Claustra è sa dustà adumbatten avant la Dretgira administrativa.

La decisiun da la dretgira è crudada ils 23 da favrer 2023. Ier memna ha la regenza communitgà ch'il chantun cumenzia uschè sper che la sentenza haja vigur cun la realisaziun da tempo 30 a Claustra. L'uffizi da construcziun dettia lura las incumbensas per installar la signalisaziun e far las marcaziuns.

Parlament communal sto decider

Per il mument n'è il termin da recurs anc betg scadi, Claustra po anc trair vinavant la chausa al Tribunal federal. L'advocat haja cusseglia dad acceptar la sentenza, di il chanzlist communal da Claustra Michael Fischer. La suprastanza haja dentant decidì da consultar il parlament communal.

Lez haja a sias uras numnadain pretendì che la vischnanca recurra a la Dretgira administrativa. Perquai duai era il parlament sez decider, schebain el accepta la sentenza u recurra a la proxima istanza. (fmr/vi)

LESCHA ASSICURANZA DA MALSAUNS

Dapli responsabladad per l'uffizi

Tenor la regenza duai l'Uffizi chantunal da sanadad survegnir dapli responsabladad.

Tenor la regenza grischuna duai da nov l'Uffizi da sanadad dal Grischun esser responsabel per la procedura d'admissiun e la surveglianza da furniturs da prestaziuns da sanadad ambulantas per l'assicuranza da malsauns obligatorica. Furniturs èn per exempel medias e medis da chasa u apotecas. Fin ussa fan las cassas da malsauns quai.

Adattaziun pervia da midament federal

Per quest motiv ha la regenza grischuna deliberà ina missiva per reverder parzialmain la lescha davart l'assicuranza da malsauns e la reduziun da las premias. Quest midament è necessari pervi dal midament da la lescha federala da las cassas da malsauns. La nova lescha duai er reglar il dumber maximal da medias e medis ambulants en il chantun. Il Cussegl grond tracta probablmain questa fatschenta en sia sessiun da zercladur. (rtf/fmr)

LA CIFRA DAL DI

40 liters

aua pon vegnir contaminads dad in sulet stumbel cigareta. In filter d'ina cigaretta cuntegn dapli che 5000 substanzas toxicas e la materia artificziala cellulosaacetat n'è betg decumponibla a moda biologica. Quai pon ins leger en la revista «Die Umwelt» 1/2023 da l'Uffizi federal per ambient. (fmr/hh)

Il roman rumantsch manca

La litteratura rumantscha è il mument cunzunt ina litteratura da poesias ed autras furmas da texts curts sco raquints. Las duas edituras Anita Capaul e Mevina Puorger publitgassan gugent dapli romans e texts pli lungs. Ma: I mancan ils texts.

SANDRO BUCHLI/FMR

«Actualmain datti ina ferma tendenza da publitgar poesias e texts curts», di Anita Capaul, la manadra da la Chasa Editura Rumantscha (CER) a Cuira. Cun paucas excepziuns èn ils ultims onns cumparids blers cudeschs da lirica rumantscha. Auturs ed auturas activas sco per exempel Jessica Zuan, Gianna Olinda Cadonau, Dumenic Andry u Tina Planta-Vital publitgeschan en emprima lingua poesias.

E quai malgrà che la lirica è in gener da litteratura che vegn sulettmain legì dad in pitschen public e vala atgnamain sco gener grev chapibel. In'egliada en las glistas da semper-verds dad autras linguas conferma che lirica è nunpopulara: Be fitg darar chatta in cudesch da poesias la via en ils top 10.

«La prosa manca»

«La prosa rumantscha manca prest cumplettmain quests dis», di l'editura Mevina Puorger. Ella publitgescha bain era prosa, ma surtut ediziuns e reediziuns da «classichers» sco ils raquints da Balser Puorger u las novellas da Selina Chönz. Cun sia chasa editura ha era ella ils ultims onns edì numerus cudeschs da poesias contemporanas, e cun quels era guadagnà premis naziunals per ils trais cudeschs «Ultim'ura da la not /Letzte Stunde der Nacht» da Gianna Olinda Cadonau, «tinnitus tropic» da Flurina Badel e «be cun rispli» da Jachen Andry. L'editura cun sedia a Turitg di: «Jau ediss fitg gugent era prosa rumantscha, magari era in roman, ma il mument na datti nagut – u be en il zuppà.»

Cun in sguard sin las publicaziuns dals ultims onns constatescha ella era il trend en direcziun da la furma curta. Sin il champ da la prosa datti actualmain be pauc texts. E sche, lura èn quai savens transcripziuns dad «Impuls» da Radiotelevision Svizra Rumantscha, columnas che vegnan republicadas u raquints curts. «Forsa è l'autur sursilvan Leo Tuor ni ils auturs engiadinais Rut Plouda e Görr Klainguti anc ils unics en la litteratura rumantscha che scrivan prosa rumantscha, era

pli lunga», di Mevina Puorger. Almain per il mument è quai uschia. Auturas ed auturs sco per exempel Arno Camenisch u Leta Semadeni che scrivessan u scrivevan bain era prosa, publitgeschan per gronda part per tudestg (u en furma bilinga) lur cudeschs.

Betg ina «spezialitad rumantscha»

Anita Capaul da la Chasa editura Rumantscha accentuescha che quel trend da las poesias na saja dentant betg be ina «spezialitad rumantscha». Era edituras ed editurs da la Svizra tudestga èn pli e pli confruntads cun texts en for-

«Cler, i faschess plaschair dad avoir in grond raquint rumantsch.»

Anita Capaul, manadra da la Chasa editura Rumantscha



In sguard sin ediziuns da poesias da la Chasa editura Rumantscha dals ultims onns. Tuttas trais publicaziuns da Leta Semadeni, Dumenic Andry e Jessica Zuan han recaltgà premis naziunals e regionalis.

FOTOS MAD

mats curts.

«Quai è dad ina vart da declarar cun la tendenza generala da la societad che tut vegn consumà a la svelta ozen di. SMS, Whatsapp, Instagram – ozendi vegnin nus inundads cun infurmaziuns da tut las varts», di Anita Capaul. Ed uschia manca tenor ella mintgatant fors era la pazienza da star pli ditg vi dal text. «La litteratura u las furmas da litteratura n'èn gea la fin finala nagut auter che in spivel da la societad.»

Da l'autra vart han tenor Anita Capaul las furmas curtas era adina gi inaschertà tradiziun en la litteratura rumantscha. Las stampas regiunals cun lur gasettas han mingamai aschuntà in fegliet cun litteratura, per exempel novellas u poesias. «E là n'eri era betg blera plazza per lungs raquints.»

In givisch da las edituras

«Cler, i faschess plaschair dad avoir in grond raquint rumantsch. Per mai persunalmain fissi in grond regl da pudair m'aprofundar en in roman rumantsch pli lung», admetta Anita Capaul.

Tge dovria lura per che Rumantschas e Rumantschs na scrivian betg «mo» poesias, ha la FMR vulì savair.

Unisono èn las edituras da l'avis: I dovra temp! «Scrifer in roman è enorm intensiv ed i dovra in bun fil e stil da raquintar», di Anita Capaul. Mevina Puorger agiunta: «Scrifer in roman n'è betg fatg en duas secundas, ed i dovra era talent.»

Ella regorda a l'autur rumantsch Cla Biert che aveva cun ses roman «La müdada» l'onn 1962 publitgà fors il pli «lung» roman da la litteratura rumantscha insomma: «Cla Biert era diversas stads e vacanzas vi da scrifer

quest roman!»

Era contribuziuns u «sponsoring» dal maun public u da fundaziuns fissan en sasez gia avant maun. Da la Lia Rumantscha e da la Pro Helvetia datti tenor Anita Capaul da principi adina puspè programs che promovon per exempel dimoras pli lungas per propi pudair sa deditgar ad in project artistic sco per exempel scrifer in roman.

Ma: la fin finala dovri era la gliעד che gughegia da scrifer in roman. Ed il «pool» dad auturas ed auturs è gist en ina lingua minoritara anc pli pitschen che en linguas pli grondas.

Per entant vai vinavant cun las furmas curtas en la litteratura rumantscha. La proxima fin d'emna ha lieu il «festival LitteraturANairs». En il center da quel stat: la lirica. Ed er las proximas ediziuns da las duas chasas edituras rumantschas han in focus sin la furma curta.



Trais ediziuns da poesias rumantschas da success dals ultims onns or da la chasa editura editionmevinapuorger.

FOTOS MAD

«Scrifer in roman n'è betg fatg en duas secundas, ed i dovra era talent.»

Mevina Puorger, editura editionmevinapuorger